

碧虛子陳景元曰理勢然也

穎濱蘇轍曰世不知道之足以贍足萬物也而以智慧加之於是民始以僞報之矣

六親不和有孝慈國家昏亂有忠臣

穎濱蘇轍曰六親方和孰非孝慈國家方治孰非忠臣堯非不孝而獨稱舜無瞽叟也伊尹周公非不忠也而獨稱龍逢比干無桀紂也

黃茂材曰六親不和而後舜以孝名國家昏亂而後比干以忠顯大道既裂儒墨相攻而後老子之書出使天下常如太古鴻荒之世吾知老子昧昧然莫知其影響何書之可作哉

道藏輯要

道德真經
彭鶴林集注

平

心集六
川日一

絕聖棄智章第十九

絕聖棄智民利百倍

御註曰道之與性一而不雜離道爲德是名聖智絕而棄之與道同體則各安其性命之情其利溥矣

碧虛子陳景元曰河上公曰五帝畫象倉頡造書不如三皇結繩無文之治也莊子曰去小智則大智明經曰以智治國國之賊

穎濱蘇轍曰非聖智不足以知道使聖智爲天下其有不以道御物者乎世之人不足以知聖智之本而見其末以爲以巧勝物者也於是馳騁於其末流而民不勝其害矣故絕聖

棄知則民利百倍

臨川王安石曰所以返樸也

達真子曰大道廢故能舉其道者則爲聖能知其道者則爲智是聖智因道廢而名也方道無不舉則聖之名可以絕道無不明則智之名可以棄道於天下無不舉無不明則民無不利者也故曰民利百倍又名聖者爲其有不聖也名智者爲其有不智也

清源子劉驥曰聖人體道之真以治身則墮肢體黜聰明離形去智同於大通聖智仁義猶當絕而棄之況其他乎

黃茂材曰古之士也從事於道是非都忘有無俱遺悠然樂

道藏輯要

道德真經
彭鶴林集注

全

心集六
川上三

於放曠之野聖智無所施况仁義乎仁義無所用况巧利乎夫如是故一身妙用隨取而有故曰民利百倍

絕仁棄義民復孝慈

御註曰民將反其性而復其初不獨親其親子其子其於孝慈也何有

碧虛子陳景元曰是欲人全其性命

潁濱蘇轍曰未有仁而遺其親者也未有義而後其君者也仁義所以爲孝慈矣然及其衰也竊仁義之名以要利於世於是子有違父而父有虐子此則仁義之迹爲之也故絕仁棄義則民復孝慈

黃茂材曰孝慈民之性也累盡性復故曰民復孝慈
絕巧棄利盜賊無有

御註曰爲機變之巧有欲利之心是皆穿窬之類也

碧虛子陳景元曰擿玉毀珠焚符破璽使民樸鄙而盜自止
潁濱蘇轍曰巧所以便事也利所以濟物也二者非以爲盜
而賊盜不得則不行故絕巧棄利則盜賊無有

葉夢得曰利富之也孝慈教之也盜賊禁其爲非也而不知
天下由是而愈亂

黃茂材曰戕天和而伐本眞者一切銷去故曰盜賊無有

此三者以爲文不足故令有所屬

道藏輯要

道德眞經
彭鶴林集注

全

心集六
川文川

御註曰先王以人道治天下至周而彌文及其弊也以文滅
質文有餘而質不足天下舉失其素樸之眞而日淪於私欲
之習老氏當周之末方將祛其弊而使之返本故攘棄仁義
絕滅禮學雖聖智亦在所擯彼其心豈眞以仁義聖智爲不
足以治天下哉先王之道若循環救文者莫若質故令有所
屬謂見素抱樸少私寡欲也

涑水司馬光曰屬著也聖智仁義巧利皆古之善道也由後
世徒用之以爲文飾而內誠不足故令三者皆著於名而喪
其實

潁濱蘇轍曰世之貴此三者以爲天下之不安由文之不足

故也是以或屬之聖智或屬之仁義或屬之巧利蓋將以文治之也然而天下益以不安曷不反其本乎見素抱樸少私寡欲而天下各復其性雖有三者無所用之矣故曰我無爲而民自化我好靜而民自正我無事而民自富我無欲而民自樸此則聖智之大仁義之至巧利之極也

黃茂材曰三者聖智也仁義也巧利也皆性外事特其文爾不足以爲道故令有所屬者屬於道也

程大昌曰其屬之之地卽樸素而節私欲者是也

見素抱樸少私寡欲

臨川王安石曰不言守素而言見素不言返樸而言抱樸不

道藏輯要

道德真經
彭鶴林集注

全

心集六
川上川

言無私而言少私不言絕欲而言寡欲蓋見素然後可以守素抱樸然後可以返樸少私然後可以無私寡欲則致於不見所欲也

陳象古曰少私寡欲絕棄之機要也

黃茂材曰至道無華樸素而已所見者素其見無非道矣所抱者樸其抱無非道矣私可以無何少之云欲可以絕何寡之云見素抱樸爲上智言少私寡欲所以誘進中下之士者也

絕學無憂章第二十

絕學無憂